



বাংলাদেশ

গেজেট

অতিরিক্ত সংখ্যা

কর্তৃপক্ষ কর্তৃক প্রকাশিত

মঙ্গলবার, জানুয়ারি ১, ২০১৩

[বেসরকারি ব্যক্তি এবং কর্পোরেশন কর্তৃক অর্থের বিনিময়ে জারীকৃত বিজ্ঞাপন ও নোটিশসমূহ]

বীমা উন্নয়ন ও নিয়ন্ত্রণ কর্তৃপক্ষ

১৩৯, মতিঝিল বা/এ

ঢাকা।

প্রজ্ঞাপন

তারিখ, ২৩ কার্তিক ১৪১৯ বঙ্গাব্দ/০৭ নভেম্বর ২০১২ খ্রিস্টাব্দ
এস.আর.ও নং ৩৭৯-আইন/২০১২।—বীমা আইন, ২০১০ (২০১০ সনের ১৩নং আইন) এর ধারা ১৪৮, ধারা ১৭ এর সহিত পঠিতব্য, এ প্রদত্ত ক্ষমতাবলে কর্তৃপক্ষ, সরকারের অনুমোদনক্রমে, নিম্নরূপ প্রবিধানমালা প্রণয়ন করিল, যথা ঃ—

১। শিরোনাম ও প্রবর্তন।—(১) এই প্রবিধানমালা বীমা উন্নয়ন ও নিয়ন্ত্রণ কর্তৃপক্ষ (সেন্ট্রাল রেটিং কমিটি) প্রবিধানমালা, ২০১২ নামে অভিহিত হইবে।

(২) ইহা ১লা জানুয়ারি, ২০১৩ খ্রিস্টাব্দ তারিখ হইতে কার্যকর হইবে।

২। সংজ্ঞা।—(১) বিষয় বা প্রসঙ্গের পরিপন্থী কোন কিছু না থাকিলে, এই প্রবিধানমালায়—

(ক) “আইন” অর্থ বীমা আইন, ২০১০ (২০১০ সনের ১৩নং আইন);

(খ) “কর্তৃপক্ষ” অর্থ বীমা উন্নয়ন ও নিয়ন্ত্রণ কর্তৃপক্ষ আইন, ২০১০ (২০১০ সনের ১২ নং আইন) এর অধীন গঠিত বীমা উন্নয়ন ও নিয়ন্ত্রণ কর্তৃপক্ষ।

(১৯)

মূল্য ৪ টাকা ৪.০০

(২) এই প্রবিধানমালায় ব্যবহৃত যে সকল শব্দ বা অভিব্যক্তির সংজ্ঞা দেওয়া হয় নাই, সেই সকল শব্দ বা অভিব্যক্তি বীমা আইন, ২০১০ (২০১০ সনের ১৩নং আইন), অথবা বীমা উন্নয়ন ও নিয়ন্ত্রণ কর্তৃপক্ষ আইন, ২০১০ (২০১০ সনের ১২নং আইন) এ যে অর্থে ব্যবহৃত হইয়াছে সেই অর্থে প্রযোজ্য হইবে।

৩। **সেন্ট্রাল রেটিং কমিটি গঠন।**—(১) এই প্রবিধানমালা কার্যকর হইবার তারিখ হইতে নন-লাইফ ইস্যুরেন্স ব্যবসার জন্য প্রিমিয়াম হার, শর্তাদি এবং বীমাকারী কর্তৃক প্রস্তাবিত হইতে পারে এমন হার, সুবিধা ও শর্তাদি নির্ধারণ এবং নিয়ন্ত্রণের উদ্দেশ্যে কর্তৃপক্ষ 'সেন্ট্রাল রেটিং কমিটি' নামে একটি কমিটি গঠন করিতে পারিবে।

(২) নিম্নলিখিত সদস্যগণের সমন্বয়ে সেন্ট্রাল রেটিং কমিটি গঠিত হইবে, যথা ঃ—

- (ক) কর্তৃপক্ষের চেয়ারম্যান, পদাধিকার বলে কমিটির প্রধান হইবেন;
- (খ) চেয়ারম্যান কর্তৃক মনোনীত কর্তৃপক্ষের দুই জন সদস্য;
- (গ) কর্তৃপক্ষ কর্তৃক মনোনীত নন-লাইফ বীমাকারীর ৩ (তিন) জন প্রতিনিধি;
- (ঘ) বাংলাদেশ বীমা এসোসিয়েশন কর্তৃক মনোনীত নন-লাইফ বীমাকারীর ৪ (চার) জন মুখ্য নির্বাহী কর্মকর্তা।

(৩) কর্তৃপক্ষ কর্তৃক মনোনীত কর্তৃপক্ষের কার্যালয়ের একজন কর্মকর্তা সেন্ট্রাল রেটিং কমিটির সাচিবিক দায়িত্ব পালন করিবেন।

(৪) সেন্ট্রাল রেটিং কমিটি উহার কর্মে সহায়তার জন্য, প্রয়োজনবোধে, এক বা একাধিক উপ-কমিটি গঠন করিতে পারিবে।

৪। **সেন্ট্রাল রেটিং কমিটির ক্ষমতা ও কার্যাবলী।**—(১) সেন্ট্রাল রেটিং কমিটি, সময় সময় এবং যতদূর সুবিধাজনক প্রতীয়মান হয়, কোন ঝুঁকি বা কোন শ্রেণীর ঝুঁকিসমূহের ক্ষেত্রে নন-লাইফ বীমাকারী কর্তৃক সম্ভাব্য প্রস্তাবিত হার, সুবিধা ও শর্তাদি সুপারিশ প্রদান;

(২) কোন ঝুঁকি সংশ্লিষ্ট হার, সুবিধা ও শর্তাদি নির্ধারণ, সংশোধন ও পরিমার্জন করিবার ক্ষেত্রে সেন্ট্রাল রেটিং কমিটি যতদূর সম্ভব নিশ্চিত করিবার চেষ্টা করিবে, ঝুঁকি এবং অপরিহার্যভাবে সমপর্যায়ের বিপদের মধ্যে কোন অন্যায্য বৈষম্য নাই, এবং বিগত ও সম্ভাব্য ক্ষতির বিষয়টিও বিবেচনা করা হইয়াছে ঃ

তবে শর্ত থাকে যে, সেন্ট্রাল রেটিং কমিটি অবিন্যস্ত হ্রাস-বৃদ্ধিসহ অতীত অভিজ্ঞতায় আরোপযোগ্য বিশ্বাসযোগ্যতার মাত্রা বিবেচনা করিতে পারিবে এবং উহার বিবেচনায় প্রচণ্ড অগ্নিকাণ্ড বা বিপর্যয় বা উভয়সহ ভবিষ্যৎ হ্রাস-বৃদ্ধি ও ভবিষ্যৎ অনিশ্চয়তাও বিবেচনা করিতে পারিবে।

(৩) এই প্রবিধানমালার অধীন কার্যক্রম পরিচালনা করিবার জন্য সেন্ট্রাল রেটিং কমিটি লিখিত নোটিশ দ্বারা যে কোন বীমাকারীকে প্রয়োজনীয় তথ্য বা বিবরণ, সরবরাহ করিবার নির্দেশ প্রদান করিতে পারিবে এবং এতদুদ্দেশ্যে সেন্ট্রাল রেটিং কমিটি কর্তৃক নির্ধারিত সময়ের মধ্যে উক্ত বীমাকারী উক্ত তথ্য বা বিবরণ সরবরাহ করিতে বাধ্য থাকিবে।

(৪) এই প্রবিধানের অধীন সরবরাহকৃত যে কোন তথ্য বীমাকারীর মুখ্য নির্বাহী কর্মকর্তা কর্তৃক প্রত্যায়িত হইতে হইবে।

(৫) উপ-প্রবিধান (৩) অনুসারে কোন বীমাকারী কর্তৃক সরবরাহকৃত কোন তথ্য বা বিবরণের সঠিকতা, এবং তৎকর্তৃক ইস্যুকৃত সকল পলিসির পূর্ণ তথ্যাদি সরবরাহ করা হইয়াছে কি না, উহা যাচাই করিবার জন্য লিখিত নোটিশ প্রেরণপূর্বক সেন্ট্রাল রেটিং কমিটি বীমাকারীর হিসাব-বহি, খতিয়ান, পলিসি-রেজিস্টার এবং অন্যান্য বহি বা দলিলাদি পরিদর্শন করিতে পারিবে এবং উক্ত পরিদর্শনকালে বীমাকারী সকল প্রকার সুবিধাদি ও সহায়তা প্রদান করিবে।

(৬) বীমাকারীর আবেদনের প্রেক্ষিতে কর্তৃপক্ষের অনুমোদন সাপেক্ষে সেন্ট্রাল রেটিং কমিটি যে কোন সময় ঝুঁকি, ক্ষতির সমন্বয় বা অগ্নি-নির্বাপক সরঞ্জামাদি সম্পর্কিত প্রতিষ্ঠান পরিদর্শন করিতে পারিবে; এবং প্রয়োজন অনুযায়ী ঝুঁকি, ক্ষতির সমন্বয় বা উক্তরূপ সরঞ্জামাদির পর্যাণ্ডতা সম্পর্কে বীমাকারীকে উপদেশ প্রদান করিতে পারিবে :

তবে শর্ত থাকে যে, সংশ্লিষ্ট প্রতিষ্ঠানের লিখিত অনুমতি ব্যতিরেকে উক্তরূপ কোন পরিদর্শন করা যাইবে না।

কর্তৃপক্ষের আদেশক্রমে

এম. শেফাক আহমেদ, এ্যাকচুয়ারী

চেয়ারম্যান

বীমা উন্নয়ন ও নিয়ন্ত্রণ কর্তৃপক্ষ

১৩৯, মতিঝিল বা/এ, ঢাকা-১০০০।

মোঃ আব্দুল বারিক (উপ-সচিব), উপ-পরিচালক, বাংলাদেশ সরকারি মুদ্রণালয়, ঢাকা কর্তৃক মুদ্রিত।

আবদুর রশিদ (উপ-সচিব), উপ-পরিচালক, বাংলাদেশ ফরম ও প্রকাশনা অফিস,

তেজগাঁও, ঢাকা কর্তৃক প্রকাশিত। web site: www.bgpress.gov.bd